

四庫全書

集部

欽定四庫全書

吳文正集卷六十九

元 吳澄 撰

墓表三

大元昭勇將軍河南諸翼征行萬戶贈宣忠秉
義功臣資善大夫湖廣等處行中書省左丞
上護軍齊國張武定公墓表

公燕人世居東安祖考仁義管軍元帥贈推忠守義功

臣中奉大夫河南江北等處行中書省參知政事護軍
追封齊郡公謚武毅祖妣李氏追封齊郡夫人考禧鎮
國上將軍日本行中書省參知政事贈推誠著節功臣
榮祿大夫湖廣等處行中書省平章政事柱國追封齊
國公謚忠烈妣國氏追封齊國夫人公諱弘綱字憲臣
膂力使藝冠絕部伍自小從軍先登陷陣平地超躍上
馬足不履蹬射虎輒殪視若狐兔攻城被二甲野戰則
被一甲從元帥阿朮往來襄漢兩營間十餘年每與宋

騎兵遇左臂掇革圓牌周旋護衛矢不及身惟元帥及公二人能用此它人不能也湖州寇數萬行省命公率數千兵往捕公距賊巢十里而營或曰賊近知我虛實倘率衆圍我坐視危困不若急攻乘其未備公曰吾有萬全計爾姑俟誘致山中老人數輩諭之曰汝等各有一妻子產業棄安樂趨死亡何耶汝能徧告若儔及今改圖猶可生也如其不然金鼓一震悔之無及老人皆叩頭曰實非好亂為賊所逼今日生死惟在將軍公命數

吏不持弓矢從老人至賊所約以三日內釋兵還家者
為良民衆悉如約無或後期給安慰檄文揭之于門令
諸軍毋得驚擾復業之家乃分道入山餘寇僅羸百數
一一就擒諸軍賀曰今日見公萬全之計矣公曰賊衆
我寡林密山深弓馬不便若不示以生路數萬之衆致
死向我我何以當先散其黨則擒之易爾行省又命捕
建德盜邇亦平定公初鎮暨陽移鎮京口又移鎮通州
禁止擄掠出巡鄉村自齎糧食民訴軍卒攘雞豚奪衣

服聽其隨行前至阻水有橋處立馬集衆搜檢各卒行
橐俾詞者識證攜去量物輕重受笞謂再犯必加重刑
竟無復有敢犯者由是鄉民安居深感公德其後公去
不復莫不興哀流涕公孝於事親少時已能脫父母於
難嘗逢參政公怒撻之流血畧無疾怨人問之隱其事
曰偶爾觸物而傷奔參政公喪年已六十晝夜兼行多
下馬步走通州抵都城之南二千里不半月而達望柩
慟哀幾至隕滅教子甚嚴然未嘗厲聲色家法整肅內

外截截女子無大故不出中門友兄弟睦姻戚見貧乏者必周其急接人恭謹饌客豐盛而自儉約雖愛妾無麗服晚年好讀書暇日嘗就館賓講論歷官管軍總把陞總管招討副使陞正使終河南諸翼征行萬戶府萬戶初以忠顯校尉佩銀符繼以昭信校尉佩金符進廣威將軍定遠大將軍以至昭勇將軍佩三珠虎符公之卒有行狀有墓誌有神道碑歿後二十四年贈宣忠秉義功臣資善大夫湖廣等處行中書省左丞上護軍追

封齊郡公謚武定元配左氏追封齊郡夫人繼室楊氏
封郡大夫人公之子庶訪副使漢將立石以紀恩命之
隆徽文於予惟公孝義忠勇出自天性平宋立戰功征
蠻著死節其勲名赫赫在人耳目狀誌碑已具載茲不
再錄撫公遺事一二以表于墓云

故徐令人黃氏墓表

清江徐鑑曰鑑生三月而喪所恃惟祖母焉依否則無
以至今目祖母繫出崇學卿上湖里之黃家世儒族福

州助教諱甲之孫彬州司法諱汝礪之子也宋景定壬戌歸于我祖父左史兵部侍郎蒙恩累封令人歸之歲侍郎已登進士科隨宦湖南連治劇縣號稱良吏進陞朝班歷諫臺侍從號名卿蓋齊家得內助力心慮靡所分國爾公以是聲聞副其實運其革兵焚先君奉令人間道還家未幾侍郎亦歸隱越五年至元庚辰始捐館令人獨主家政垂四十年延祐丁巳冬乃終年八十一衆口稱羨謂一身五福備矣自奉簡質每服浣濯縫補

之衣雖高年猶然鞠訓諸孫諸外孫慈愛均壹禮遇宗
戚各稱其情有腴無替舍食賓客罔或懈厭蒞家嚴肅
而待下有恩咸感悅畏憚遠近族姍竊視所行取其家
範日坐堂上區畫纖悉夜分乃寐率以為常處事曲當
有丈夫弗能逮者卒後二歲葬富州奉定丁卯十一月
朏改葬檀溪之西園祔于侍郎之兆墓相距尋有奇其
初窆鑑之姑夫李嘗有述以納諸壙今再窆矣敢祈先
生一語光泉壤噫予昔獲與今人之子同知暨其壻學

士者游審其內治信如今所云鍾愛季女館壻于室其
子之事母甚孝子孝壻愛舉不及終養然前有孝子後
有慈孫其存其歿俱有福也以鑑所言合予所知而表
於其墓焉子震早亡次茂同知安慶州事壻豫章李泉廬
陵文陞集賢直奉訓大夫孫則誠清湘縣尉鑑征東行
省理問所知事鑄改名九成珍州儒學正是為表

元贈承事郎同知深州事崔君墓表

往年予客金陵真定崔原道建南行臺人職剛腸疾惡

勇於赴義以予泥古不徇今言行或相契暇隙數數過
從子嘉亦來問學南臺仕九十月朝命受廣西憲囑丁
艱改授廣東憲囑任滿選充星子縣尹縣隸南昌路與
予所居同為江西道俾嘉造予求文文其考承事君之
墓石承事君諱傑字彥卿其先臨川人臨降淄三郡俱
有墓墳高祖某在金擢魏科曾祖某宣武將軍扈親王
鎮河南柘城縣因而家焉祖某為儒不仕父某母孟氏
壽近一百歲國朝既得河南地徙遺民實北邊君奉父

母自柘城徙真定之元氏縣倉卒就道程期逼迫上世
誥勅譜牒悉委棄中途而去乘更革之會取爵位者不
一君獨闢萊園蔬耕種自樂寬厚謙讓儀度有古長者
風聞人善亟稱不絕口聞人惡戚然懼其陷罪畧里人
聞閱輒不即官府而詣君判曲直公誠能服人心故也
廓廓有容忍或肆凌侮待以一笑彼自愧慙而止延祐
庚申七月之望疾終于家年八十四子貴贈承事郎同
知深州事配馮氏勤儉克相養姑至孝先卒年五十贈

宜人子男三長道原字君章次某字君美季天瑞字君祥女二適曹適張孫男五德嘉允誠愚女二曾孫男三女一君章混混流俗中毅然特異今觀其家之所積若是
是有良考固宜有名嗣嘉之學文進進立身揚顯未可涯也為書所聞以表于墓前

石城胡際叔妻徐氏墓表

賴士胡廉言曰廉家在石城至元末廣之劇寇駐賴境當路不亟殄平受其降而許其留俘掠殺戮自若羣不

逞相挺而起環二三百里罹其凶害遑遑奔竄先父字際叔己丑春避寇病卒于途先母徐氏僮簪珥以葬廉甫九歲弟紹甫六歲二女兄幼德已適賴幼端未行寇勢益張其冬往依舅氏僉謂亂世殺禮多婚庚寅春以次女兄適廖舅家難久居轉依長女兄扈息始復故里滿目蒿萊死者過半田無人耕一二鄰舊雖為編茅蓋頭然槁無生意莫可安栖依近族依遠族依內親依外親或半月或一月或二三月靡有定止如是又數年乃

還草廬之中習耕寥間荒涼人所不堪庶捫履賣卜弟
造箬笠母隆冬練衣晝夜不下機不停梭共營二子一
母之衣食不死於凍餒幸爾庶年二十出訓蒙童歲得
所奉助養自是饑寒頗紓越五六年母不待終養大德
乙巳十一月十九日棄其孤而從先父於地下哀哉吾
母慧性警敏豫見幾微避寇之初遇一舊識荷戈而趨
語先父曰左右前後皆寇指示其澤可以藏匿既至先
母疑焉從而之它其夜寇果即彼所又嘗一族偕行撤

挈行李先母督促甚急衆莫曉解行速向前者薄暮達
邑有二鹽商行緩殿後被寇追及殞命相去僅二里許
亂離之後不知三世墳墓所在母足穿草履攜庶徧處
尋訪深入荆棘叢中衣罽面傷不憚彌度經三四年遂
獲識認曾祖考妣祖考妣及叔之墳凡五祖考殯淺土
棺壞母慟哭幾絕易棺而窆適廖之女兄未半年間寇
虜其夫不歸夫兄抑使改嫁私受人聘女兄誓死不從
聘者高其義不願彊婚而罷蔬食箭筈不釋喪服一十

七年終于夫家庶伶仃孤苦日事薪水稍暇母令求書以讀儻值良友遣庶親炙庶粗識數字能書姓名以此之故吾母諱貴貞生宋淳祐癸卯備厯艱危無愠無怨男不廢所學女不二所夫皆母之教母卒時庶未娶今有妻有子矣思為卧冰負米而不可得延祐己未克啟窆葬母于栢里之賴田哀哀劬勞欲報罔極敢以為先生告予觀胡母之貧而處患難胡安之少而守志節胡庶年垂五十而哀慕不忘亦可謂賢母貞女孝子已一

家萃三善行尤難也既嘉歎之罔數因為叙次所言俾以表于其母之墓

故月舫翁熊君墓表

古豫章郡之豐城縣令稱龍興路之富州州之著姓熊最盛姓則同而族各異橫岡之熊有號月舫翁者宋淳祐庚戌九月二十五日卒距至順庚午二十一年矣其孫為從事撫郡因公過予始求其大父墓石之文嗚呼晚矣明年夏翁之壻雷芑將其妻兄雷震之命而來請益

力雷震自述其父之行曰吾父軀幹豐肥坐立凝重
和莊肅罔或傲惰同里尚書雷公宜中妻以弟之女孝
親順長治家斬斬父命為伯父顗後同父之兄先歿撫
育其孤遺若己子保護其生殖若己業內宗外戚待之
曲當晨夕詣先祠定省如親之存出入必一至四時薦
享禮甚謹里惡少肆暴潛俾鎮服雖供給公上迎徠師
旅未嘗乘時倚勢以作威豪猾漁獵於人必析以理無
所避惕排難解紛不憚勞谷費酬酢敏練蒙惠者恩之

賢士大夫時造吾門州尹陳侯元顯嘗留題云窈窕清
流環稻隴參差層閣負松岡父年艾耆齒髮不少哀飲
雖多不亂孰不期以上壽豈謂下壽而終乎葬於汨湖
之樟山予辭其請不能得乃為叙其槩焉翁之配雷氏
至元甲子年卒子男七今存者曰雷震曰霖曰霖其三
其四其五皆已逝其三出後異姓女一雷芑壻也孫男
女十七曾孫男女七鵬升公之名幼程翁之字月舫者
其自號也

故奉義大夫安定州達魯花赤禿忽赤墓表

皇元奉議大夫安定州之元侯禿忽赤皇慶癸丑六月
卒明年甲寅三月葬滑州白馬縣石佛村之先塋十有
九年矣侯之子哈喇那海任江西省員外郎乃囑前掾
史楊送來索文以表其父之墓澄卧病山間久聞員外
在省之贊畫今閱其父元侯之行蹟又知世美之有自
也侯蒙古人寓居滑之白馬縣考馬哥以軍功長千夫
嘗從軍而身有傷已出舍三十里侯年甫十六追及代

行在軍能力戰渡江南伐累獲功賞本國言語暨別國
言語俱精儒書吏文亦闕其樊充江西省通事樞密行
院立徙行院通事行院廢仍行省通事如初至元壬辰
授從事郎興國路通山縣達魯花赤政聲上徹湖廣行
省平章答剌罕選克本省通事平章遷江浙省丞相侯
隨入覲薦為江浙行省副都鎮撫未幾丞相進位中書
左丞相奏克都省通事大德己巳授承務郎吉州路總
管府判官官滿改判衡州官官滿陞奉議大夫安定州

達魯花赤未赴以疾終于衡年六十有九時長子在朝
奔喪來至偕次子卯兀那海護柩歸葬侯心地坦易德
量恢弘接物謙抑待士尤厚每談析經理書生遜服皇
子鎮南王征交趾還駐武昌世祖皇帝頗以兵出無功
咎之侯奉行省命赴都稟奏旨謂所奏不明進來使問
狀都省丞相以侯入見侯敷陳周悉上意頓釋惻然動
愛子之念遣使賜食賜酒閏慰其艱棘皇子嘉侯能回
天怒遺幣馬以報此其專對之長也從江西右丞督運

古城軍糧廣州海賊前梗侯犯難搏戰賊潰運道遂通
右丞賞以白金食器從江西平章討瑞州寇侯奮力剿
殺賊敗悉俘其黨平章賞以賊屬二十口從湖廣右丞
討廣西賊有功又受白金器皿之賞武昌百里外三虎
食民牛畜居者徙避行者阻隔侯從省官出捕一虎咆
哮前衝平章馬驚墮地侯一箭中虎以已所騎坐馬扶
掖平章上馬馳去得脫於危平章還省壯其勇且義此
其武藝之優也長一縣佐兩郡遺愛在民去而見思在

通山時邑民供給驛置道里迂迴甚以為苦侯詣省辨
訴俾蘄黃之民供淮北之驛通山之民供江北之驛各
適其便彼此之民感德在衡州時重修公廨侯慮吏胥
並緣騷動乃具飲饌延致富戶捐已俸為倡勸其輸財
以助擇庶幹人掌出納不經吏手科配新構宏麗未半
歲而功畢侵擾不及於民前此運糧之官交納倘有欠
少例責舟人賣舟以償不足則償及子女侯督湖南海
運糧數十萬躬親視其槩量受納者雖強悍侯不可欺

竟無虧耗舟人得免填欠之害前此造舟之家率至破產蓋以官吏苛迫貪求故也僕造運船五十艘召屬邑議其制度約以期限聽民自為時加勉勞執役之工民樂其寬爭先辦集未踰月而舟成民省勞費此其官政之善也聽訟斷獄不假刑威咸得其情他處疑事不決上司輒委訊鞠守職謹恪持身庶慎於官長同僚恭而有禮於府史胥徒嚴而有恩上自朝廷大臣下自閭閻小民見者莫不加敬加愛治家動遵禮法其事親也孝

妣黃氏年八十餘養致其樂喪致其哀其事長也悌家
產寶器讓與其兄忽里哈赤而以貧儉自處其撫幼也
慈有過則循循善誘勗以勗學閨門之內雍雍如也夫
人劉氏河西匡族封元城縣君淑懿柔順內助多所匡
益男二長哈喇那海由內臺監察御史兵部員外郎僉
淮東江北道肅政廉訪司事為江西等處行中書省左
右司之貳娶昭文館大學士榮祿大夫白雲平章之女
次卯兀那海襲受平江十字翼千戶達魯花赤娶鎮守

衡州張萬戶之女女二敦武校尉右帥府百戶伯顏將
仕卽肇慶路四會縣達魯花赤燕只哥其壻也孫男三
女一予觀古聖人有才難之歎以今世而論儒或不通
於吏吏或不通於儒而武之與文兩全者鮮侯家世用
武而文事克兼習尚好儒而吏事亦熟才而若是允謂
難也已況又有子不墜家聲繼今以往侯之胤胄名位
勲業有光于前奚翅如今也哉是以因其子之請而表
其美於墓石以詒方來焉

吳文正集卷六十九

欽定四庫全書

集部

吳文正集卷

七十一至
七十二

御史^臣邱文愷覆勘

武英殿纂修中允^臣馬啟泰

欽定四庫全書

吳文正集卷七十

元 吳澄 撰

墓表

元懷遠大將軍行都漕運使贈昭勇大將軍真
定路總管上輕車都尉博陵郡侯謚桓靖崔
公墓表

崔公姓也德彰公名也光甫公字也大寧富庶縣北韓

里公之家也公之考諱祥金季聚千衆於鄉及國朝兵至以其衆附得命就領之既而隸真定史帥麾下從史帥取河北山東諸郡值金降人叛帥之弟平其亂官至管軍千戶真定同知權府事公其中子也謀畧如其考憲宗朝乙卯歲攝蠡州慶都等處行軍千戶隨史萬戶成鄧西起武當東抵下邳繕治壁壘亘數千里己未歲世祖師指鄂戰武磯公敗宋江州都統軍中統元年庚申改授金符至元四年丁卯從阿朮破宋劉義砦五年

麟宋鄧若南川高頭擒其將五九年宋將張貴餉襄陽
圍城中粟乘夜出公偕諸將奪其舟而殲旃逼襄樊城
威郢黃家堡十一年冬圍沙洋渡江襲青山磯大捷十
二年春宋師潰於丁家洲公追逐百餘里獲將士二百
戰艦五十進臨毗陵督砲兵摧木柵以入克其城益公
宋兵千授宣武將軍管軍總管由宣武陞顯武復遷懷
遠大將軍兩浙江淮行都漕運使金虎符在職數年轉
輸裕如也一旦言曰曩宣力行陣委身於國奚暇恤家

之私四海既一報國事紓當歸養老母以供子職幡然棄官去十七年十二月二十七日遘疾而終年四十九明年正月九日祔葬真定真定縣治頭原之先塋夫人史氏北京路行六部尚書諱秉直之孫宣權真定河間大名衛輝濟南五路萬戶諱天安之女子男二昌武畧將軍管軍上千戶顯承直郎撫州路崇仁縣尹女二壻忠顯校尉德州齊河縣尹史炘奉直大夫僉陝西漢中道肅政廉訪司事史燿也至順元年庚午制贈昭勇大

將軍真定路總管上輕車都尉博陵郡侯謚桓靖追封
史氏博陵郡夫人而公之子在崇仁貽書云先人歿五
十年餘二親始受褒封若不勒辭以昭天寵無以盡人
子之道斬畀片文文諸石子覽公之墓誌銘神道碑載
公事蹟備矣今撮其大凡而表國恩之隆公先幾款附
智也向敵莫禦勇也竭力為國忠也念親還家孝也一
身而兼智勇忠孝之美四允矣當代之英賢乎天畀其
身前之壽而豐其身後之榮陟階賜勲疏封頒爵易名

節惠著聞土克明之功著寬樂令終之德孝子慈孫雖
百世猶將蒙其庇賴耿光彌久而彌彰焉予不及識公
而識崇仁君其潔已其愛人所謂愷弟君子民之父母
又有以增光於往昔崔氏其世祀也已

故逸士曹君名父墓表

臨川曹名父諱原傑生宋淳祐乙巳九月丙申年六十
有二元大德丙午十有二月庚申終其配龍氏諱美英
生淳祐丙午閏四月壬子亦年六十有二元大德丁未正

月丁亥終兩月間而有三年之喪二其孤以至大戊申
四月己酉塋後喪於金谿縣歸德鄉之朱陂是年六月
甲寅塋前喪於崇仁縣潁秀鄉之苦竹塋之先後合禮
矣越二十有三年至順庚午秋孤壁走二百餘里造吾
門言曰壁將改塋父喪於臨川縣明賢鄉之京谿改塋
母喪於舊穴之前二步許予瞿然驚愕噫古有改塋禮
蓋非孝子所樂或因水齧墓而改固不可已或因塋有
闕而改則不如其已也昔澄於母喪犯此惡每一思念

痛恨自訟無所容其身自惟不孝於親不願人之如已也而璧亦為之乎璧求予文以表新墓謹按舊所誌曹之曾祖漢賢祖熹考世永妣龍氏龍之曾祖延慶祖汝礪考庭瑞妣陳氏名父少習進士業恪共子職應務中倫壯歲翫醫家書有以疾告必饋之藥待人和易咸得其歡心戒其子云我死處事寬厚宜如我毋效世俗龍氏勤約工織紵奉祭嚴潔薦新嘗恐後相夫治生訓子以禮義廉恥為先噫名父良士也其配亦賢婦哉男二

長璧次惠子女四孫男六孫女五改葬之期某年月日也
故宋太學進士鮮君墓表

自古以保姓受氏之悠久為難而況後世乎吉有解歷
唐宋逮於今五六百年為儒族難已始家廬陵之同水
鄉後徙吉水之東門坊以儒發身者代不乏人鮮君諱
夢斗字孔陽一字星端工舉子詩賦宋景定甲子貢於
鄉咸淳戊辰入太學越三年庚午又以太學薦名試禮
部曾祖叔達祖寅俱不仕父谷淳祐己酉壬子兩預江

西轉運司貢母王氏以子入學恩封孺人弱冠喪父事母事兄稱孝友咸淳末喪母比服滿大運將革遂不復至大學教授於家父讓所受之田業與諸弟父之弟翔龍沒於外子幼君為歸其喪歲饑用已田易米賑施隣里母之黨貧分食以食之妻之父死鬻產以窆之科廢四十年教子若孫勿棄舊學元皇慶癸丑十有二月丙寅無疾而終年七十有九延祐乙卯十月甲申塋於鑑湖之原初娶蕭生三女再娶鄧生二男一女男應辰撫州

路儒學正應中常貳縣教劉恕廬喬鄉貢進士羅用發
建康路儒學教授胡啟壻也孫男八觀蒙聯中天厯已
已鄉貢第四第五名孫女三鄉人劉岳申已誌君之塋
應辰仕撫復請予文表君之墓君之自立若此子之追
孝若此諸孫之衮衮表表其揚名顯親可期也是為表
云

有元張君墓表

張氏之先霸州益津人金亡時就食獻州交河之建城

鎮因家焉君諱禧力本多能涉書大義敦厚朴愿不事
機巧有侵畔者讓弗與較率使愧悔里人賢之子完為
治書侍御史君受祿養至大辛亥四月四日乙巳終於
京師年八十四完奉柩歸塋於先塋是月辛酉也君之
考諱寶貧而好施罄所有賑饑隣不計家之匱乏天寒
嘗值無所栖泊之客延之宿食飛蝗入境竭誠默禱遍
集四野獨不犯其稼君之妣王氏生甫八歲而喪事繼
母趙氏如母君之配趙氏世居建城之北理家勤儉有

法先七年卒得年七十君之子五曰進曰忠曰完曰賜
曰信進簡重不苟忠質直自怡完事成宗於潛邸得見
世祖初受承事郎興國路判官廉明有聲遷戶部司計
出點視倉站遇鷹房官害民歸上彈于省再遷監察御史
擊彊無所避忌丁母憂去服滿超擢太中大夫治書侍
御史風力如監察時忤尚書省權姦幾不免聖上龍飛
將顯用又以父憂去除河東道廉訪使轉正議大夫同
知總管皆不赴除工部尚書不及祿而卒賜端恪早亡

信溫謹給事皇太后宮君之孫七進所生曰允曰正曰
誠忠所生曰賢完所生曰彛曰仁嘉信所生曰禮君之
曾孫四正所生曰定安誠所生曰鐸柱賢所生曰永安
曰燕珮君之女一壻劉順孫女八完在御史臺糾尚書
省之過舉朝愕眙余時在國子監令國子生張策告曰
人臣惟忠與智忠者不愛身不負國智者有益於國不
危其身復命曰吾寧死不顧予嘉嘆焉雖未合中行可
謂直臣矣其卒也遺言命彛曰吳司業文必傳世爾往

求又以表爾祖之墓吾死不憾彛遵父命因張策來請
澄不可辭也於是為之序次云爾

詹統制墓表

宋勇勝軍統制官詹侯開慶己未之夏戰死於蜀勇勝
軍屯鄂之城外其秋大兵奄至降其軍而侯之妻子在軍
中俱北徙子里始四歲時世祖皇帝以親王總兵柄河北
董忠獻公從世祖具知侯在蜀力戰不降狀謂公曰佳
父必生佳兒汝其善護視公鞠誨同己子名之曰士

龍既成人仕州縣以廉惠稱追痛其父常忽忽不樂及擢江南諸道行御史臺監察御史按厯荆楚所至訪其父遺跡有宋士錄國亡之際能城守野戰死者人各為傳而侯與焉得其傳又稽諸故老遺黎退卒之口參伍附益歸以語其友友輯為事狀持示臨川吳澄曰吾父以節死居北之五年吾母亦死不肖孤僅存大德壬寅冬具衣冠招吾父之魂與吾母合塋鎮江丹徒崇德之硯山懼弗克揚先烈將遂沉泯則終天無涯之痛愈不

可塞願有述以表於墓敢以累子澄禮辭不許於是讀
傳為狀而哀侯之所以死嗚呼歐陽公論五代之臣全
節而死者三王彥章其首彥章北面朱梁蓋路人一旦
為君臣歲月甚淺鮮無足道而弗貳所事百世之公議
猶建之宋三百年仁義之國豈朱梁比而其季也死宗
廟社稷死城郭封疆求如項籍田橫劉湛諸葛瞻顏景
卿張巡許遠南霽雲輩一何寥寥獨侯以下官微祿出
入行陣仡仡不挫如此世亦曷嘗無人哉嗚呼稀矣侯

之死以蜀重慶告急宋大將往援侯率偏師以前破營壘十數攻蜀之帥號紐綸有善戰聲大將畏懼得小捷遽謀左次以遁侯見帥深入不戒驟領數十騎來往有敵輒迎又喜遠追謂其輕脫可獲也大將逗留侯率所部獨進進叙州南平隆化縣界遇游騎什什伯伯接戰無大勝負日中帥以精騎數千至侯之衆不滿千人皆敢死士馳突衝擊力戰不少却遣卒詣大將求救方引衆趨山顧望竟不赴侯棄所乘馬立射發無不斃帥兵

屢却然以步敵騎衆寡幾十倍騎生力分番迭鬪日昃
戰未罷步之所殺已過當而死傷者十七八矢貫侯臂
裂帛裹創復射連中數十創創甚矢盡衆稍稍散逸聚
者猶數十人傷重莫能軍侯被執帥壯其勇期生之侯
大罵求速死亦不加害翼日帥親視其創饋之食與藥
侯標去弗受絡寘馬上載以行八日不食至播州土門
死年五十二帥還都輒對儔黨言嘖嘖獎嘆曰好人好
人且曰其箭不可當侯之從子二其一先數歲戍巴州

戰死其一後數歲邀隨州歸師戰死婿王杞守樊城樊城陷不降亦死一門死者四人侯光州固始人諱鈞少負奇氣啞齷齪儒樊精神事無用語每云讀書了大意耳暇日挾勁弓驅馬出平原廣野指南北東西射曰大丈夫立功名當以是萬殿帥罷之妻以兄女由邊郡材技良家子選補軍職隸武定軍屯光徙屯黃勇勝軍後叛并取於武定而以侯為副其將後於襄陽城上走馬墮城下死侯叱曰大丈夫不死敵而死於是兒女子爾

制置使遂以侯代將充統制官寶祐間蜀歲歲用兵往來粹渠開達等州扞禦周備蜀人賴以完聚嘗深入蠻徼築建城堡化服羣獠撫以恩信任事不避險艱有如此捐軀徇國其素志也而竟以敢戰死嗚呼悽矣夫人萬氏蚤卒再娶胡氏生士龍今繇監察御史僉嶺南廣西道肅政廉訪司事子澍亦嗜書愿而周於務嗚呼自古忠臣義士身不食其報者往往報於其子孫然則侯之後宜大蓋已覩其兆矣

姜公宜墓表

公宜姜姓也諱端義其祖某娶曾氏生子興不幸早世
子幼家貧祖母曾適李生子二人興嗣鞠於李李為之
冠娶因冒李姓生端仁端義皆聚學徒教授於家端義
年十二而孤事祖母甚孝事伯兄甚恭其祖母嘗曰此
孫善奉養我李之子亦曰此兒善奉養吾母伯兄暨嫂
相繼殞沒遺三女一子長其女嫁之撫其子如己子子
未冠而夭配鄔氏生時敏時中臨終語其二子曰吾祖

姜也吾祖母歸李有子有孫承祀吾姜姓子孫而稱為
李姜遂無後可乎復初姓續祖祀吾志也汝其以姜誌
吾墓比塋時敏之師許文薦為撰誌銘明李姓之冒而
未正姜姓之稱於後時敏職西澗書院訓導乃具其事
白書院長移文有司有司下里胥覈實如其言改其戶
籍曰姜時敏謂予曰先考生宋淳祐甲辰八月辛未卒
元大德戊戌二月壬戌十月癸酉塋長安鄉北原之夏
坑先妣生宋淳祐己酉六月丁卯卒元大德丁未六月

丁巳七月乙酉附塋先考墓左今初姓已復其可無文
以表諸墓先生景貺之所以光照本繫庇覆遺嗣者渥
矣敢以請予既叙其始末諭於後之人謹按儀禮傳夫
死妻不已與其子適人繼父為子築宮廟歲時使之祀
妻不敢與嗚呼古之處人倫之變何其思與義之兩盡
也為繼父而知此禮豈至於妻人之妻子人之子而遂
易人之姓絕人之祀也哉此理不明則雖范文正公之
賢隨母而嫁猶不免於姓朱况不如范公者乎然范公

能復姓於其身姜之姓厯三世至其孫而始追復抑又
重可嘆也時敏不忍絕其祖之祀不敢忘其父之命必
復其姓而後快於心嗚呼可謂慈孫孝子也已且將以
其弟時中後其世父端仁嗚呼厚之道也其美不可以
不書書之為公宜墓表

故袁君季時墓表

友人袁繹字季時工進士策論詩賦諄勤嚴肅善教導
人家子弟所讀經書語音辭義考訂詳審不苟焉隨俗

舛訛為人剛正無一毫媚柔態以此不諧於俗人鮮知之然見者必敬畏不敢有慢侮心以大德丙午九月十日卒年六十有四卒之次月葬於所居之南初娶溫氏再娶彭氏三娶李氏生四男二女男祖仁祖義祖忠祖信女適詹鏞余瑞季時長予六歲同鄉久交既葬予始還舊山既拜其墓而祖仁請文以表諸墓門嗚呼以季時之才而不遇命也夫

故儒學教諭余府君墓表

府君諱珏字玉甫宋紹定壬戌閏九月十二日己未生
習進士詩賦累應鄉貢不利元至元間江東道儒學提
舉司授信州路貴溪縣儒學教諭不赴會撫州路宜黃
縣儒學缺官江西道儒學提司命攝其事就職一月而
歸閑中以詩詞自樂詞尤超拔似辛幼安劉改之之作
大德戊戌四月二十二日戊寅以疾終於家娶袁氏方
氏男繼老女維恭孫男戊孫孫女適曾貢歐陽仕琪鄔
蘭曾孫男四人一再卜宅兆俱未安至順辛酉四月十

七日庚申遷新穴在峽山桐樹之谷澄子壻也前葬時
客外今得躬視募役乃識其月日以表於墓

吳文正集卷七十

欽定四庫全書

吳文正集卷七十一

元 吳澄 撰

墓表

前進士豫章熊先生墓表

先生宋咸淳甲戌進士第四人也授從仕郎寶慶府判官不及仕而國運終常人壯歲取高科輒沾沾自喜得之未幾而旋廢必怏怏自失先生不然當其得也不以

為加及其廢也不以為損處之裕如於是識趣過人遠矣南服始附田野間有竊發弗可寧居徙家依城市胸懷洒落態度寬和聞風者造門人人如煦春陽飲醇酎而去莫不貌敬心服有所詢諮懇懇開示不倦中州士大夫率令子弟受業朱子小學一書條分節解標註其事凡名物度數姓字稱號族繫時代一覽瞭然大有裨益於初學之士書市刻板廣傳今通行乎天下朝廷遣使定閩廣選士當路咸以名薦公議以為先生大儒師而

東南士類之盛福吉其最遂命相繼任兩郡教官以擬
安定胡公之蘇湖教官任滿部註將仕佐郎建安縣主
簿疾不赴其後再注從仕郎福清州判官致仕視之若
浮雲然自號彭蠡釣徒日鼓瑟以自怡遠近來學益衆
口講指畫俱通經能文貢舉制復門生悉堪應舉擢
科者累累三科三省禮聘校文所貢大半成進士人羨
揀擇之精在宋用周禮義策勲今制此經不與試士則
教人習禮記或漸沐其餘潤遄有明效博通羣籍而禮

樂書數尤所研究每嘆詩樂無傳倣朱子所得趙彥肅家二十四譜增二十詩俾皆可歌且謂朱子雖疑古樂必非一聲協一字而猶存此聊見聲歌之彷彿然今之音調縱未如古不猶愈於以近世操弄詞曲為樂哉嗚呼此先生之深心殆猶逃虛空之喜聞足音也倘際議禮制度考文之會幸次胡祝李之間其庶幾禮樂豈出諸君子之下也孔廟釋奠肇自唐開元禮宋政和禮因之者也升歌之辭多闕江南學宮配享有四而酌獻舊

辭止有顏孟所在因循苟簡仍以侑顏孟者侑曾思為
是更譔新辭補所不備春秋各按月律合調迎神至送
神通十八曲部使者以之遍行於諸郡惜哉此學此志
不獲顯設臺閣名流若程鉅夫若元明善屢言於朝時
未及用所譜諸詩考槃蒹葭衡門白駒一皆寓自足已
樂不斲人知之意賦又假瑟以喻不無金鑄子期之慨
焉平生著述有小學書標註有瑟譜有文集三十卷具
存觀此可以見所學之大槩矣家世豫章熊氏諱朋來

字與可學者稱天慵先生配袁氏前卒子三父命以永
先為長子象先袁出也繼室何生古孫七昶昱昇昉棟
寅富壽年七十八至治癸亥五月壬寅卒十二月壬申
合葬袁氏墓右江西行省參政廉惇自初喪至葬親臨哀
送如弟子禮遠近會葬千餘人明年自翰林直學士虞
集銘其碑越六年古來徵文表墓嗚呼予疇昔與先生
談論不舍晝夜深知其學之奧故特書予之所知而凡
前碑已載者弗瀆

有元管軍千戶贈驍騎尉年平縣子武德孫將
軍墓表

將軍諱玉寧海州年平縣人大父寶益都臨朐縣尹父
與武畧將軍管軍中千戶玉少侍父出入行陣至元己
丑父得末疾攝父總戎從其帥收捕嶺海諸寇有功越
三年辛卯將襲父職六月望卒卒之後三年癸巳宣授
管軍中千戶階忠顯校尉佩金符命下而不及受矣又
三十二年泰定甲子以子貴贈武德將軍管軍中千戶

驍騎尉追封牟平縣子配王氏追封牟平縣君其子忠顯校尉管軍中千戶贊自洪抵撫郡而邑邑而鄉走四百餘里造吾門請曰贊幼讀父書長襲世爵隨江西行中書省殆將三紀夙夜罔敢自逸懼忝前勲吾父之父武畧勇力冠軍我朝規取襄樊以來攻城畧地陷陣摧鋒洊著勞績奪樊城奪郢州奪陽邏堡渡江而南定江西諸郡以至捷厓山俱隸元帥李武愍公麾下吾父武德不得年未及報効而蒙恩贈官勲封爵邑夫為人臣

而不彰君之貺為子而不揚父之善無乃不可乎先生
畀一言文諸石以焜耀於後是教贊以為臣之敬為子
之孝也敢請予嘗游今平章李公之門頗聞先武愍公
所用偏裨多有能名而孫其一也武畧不但榮其身而
又榮其子武德不獲榮其生而榮其死此天朝甚隆甚
厚之恩臣子所當世世不忘者也予安得不樂書其事
而以表於武德之墓哉

故萍鄉州儒學教授聶君墓表

君諱斗月字文範清江崇學鄉聶氏平山居士思清之
孫將仕佐郎餘姚縣主簿應泰之子博綜羣書辭藝超
衆宋咸淳癸酉江西轉運司以進士貢於禮部國朝既
臣南土民未諳新政姦黠並緣乘時漁獵舊族往往困
瘁獨君才識通敏應事適宜見者心服莫或敢侮既克
自立同里與受庇燾至元壬辰劇盜猝至質人以求貨
君納重賂見免其母身留賊中凡同時被繫之人悉意
調護盡脫乃已越境數日而後返其極難誠切臨危不

懾有如此者由是買宅於洪奉母而居會府人物淵海
縉紳宦游雲萍旅寄莫不就見而問政款門而締交一
身仰而糊口者有焉一家待而舉火者有焉接納彌久
不倦大德庚子復還先廬錄前人貲產及已所增殖均
畀諸弟當路薦君文行勅授袁州路萍鄉州儒學教授
至大戊申之春得末疾弗克赴君儀形端莊氣象純雅敦
謹和裕表裏不二斷斷然有古鄒魯遺風孝於大父若
父若母養生送死一一如禮敬長慈幼好賢容衆賑貧

調急救患平怨宗族親暱友朋鄉黨睦婣任恤之行靡
有虧缺慧智明達而深潛掩抑守之以愚因自號守愚
以寓其志後進稱曰守愚先生生宋淳祐丁未三月朏
終元延祐丁巳十一月朏越三年己未正月庚申葬富
州富城鄉之緱山配黃氏子男四克勤後二年歿次克
潛克讓為弟斗元嗣季克修女二黃武黃允恭壻也孫
男一德符女三既葬之八年予過清江克潛示以將仕
郎前遼陽等處儒學副提舉李克家之狀請銘先德予

夙昔與君交遊思君篤行不可復見葬已久矣銘無所
施乃為叙次其狀之所述而以表於墓初餘姚主簿年
壯未毓子平山先生素尊事翰林學士豐城徐公一日
客其門值公之從弟携仲子偕來即斗月也居士一見
竒其秀偉欲求之為孫以情白徐公公可其請命從弟
以此子與聶而主簿子之其後主簿生四男及諸女君
友愛篤甚一如同出父喪弟妹猶稚鞠之長之教之各
使成才嫁之各使得所仲弟斗韓擢惠州路儒學教授

諸弟感覆育恩事兄終其身如事父又恢拓其家業益
光大其家聲人咸服居士遠謀而嘉君之善為人子無
忝付託云

故侯府君唐卿墓表

士之抱才畧負志氣者如龍泉大阿苟匣藏不試其光
燄鬱發猶將上千青冥散為綺霞綵雲晃耀衆目夫豈
寂寂落人後厭厭如在泉下以沒齒而已哉故凡無所
樹立於斯世者亦必有以樹立於其鄉而展舒抱負之

萬一若侯府君唐卿則其人也府君諱逢丙其先籍開
封從宋南渡家彭澤家宜春後徙廬陵曾大父顯仁擢
儒科宰高郵興化縣大父世昭尚書刑工部架閣遊周
文忠楊文節之門倡和詩具存父從周廣東帥屬詩集
名儗庵府君幼喪父孝養寡母魁岸偉邁援筆成章法
書足為模楷詩集名適安壯年有志四方淮蜀湘廣足
跡靡不到當路獎進嘗授司諍司征及兵馬等職不辭
卑亦不屑為也最後帥府擬準使督府擬諮議他人欲

求而不可得府君一以虛文視畧不介懷南土既歸天
朝絕仕進想心知計然之策不得施於家擇地趨時清
江鎮扼江廣之會自廬陵而家焉多畜使令行著驚事
設肆製藥以惠遠邇其所分濟徧滿東南為一鎮諸肆
之甲起身儒素不數年間齊於封君蓋以其才畧之開
闔一世者歛縮而用之是以隨試輒效有非齷齪拘攣
之徒可得而偕也其志氣之超特為何如哉貲業既饒
尚義好施石以砌江岸甃以甃市衢費雖重不辭歲饑

施粥冬寒施衾楮薪炭死而貧者畀之棺以至二教之
宮舉不吝於舍助恬澹娛老筋力不減少壯讀書教子
禮賓客外他無所經心也生宋嘉定丙子季冬仲旬之
五終元至元庚寅季秋仲旬之二夫人李氏繼教氏熊
氏男公定應順登應順為兄後女適貢士何三寄孫男
士瑞士敏士元士表士重孫女一適前真定提舉朱紘
一適前河南省宣使岑伯顏一適富州王邦榮曾孫男
六大德丙午冬葬斗岡之原弗妥延祐己未春改葬春

壇教氏墓左首乾趾巽府君三子在者唯登嗜學工詩
前勅授敦武校尉管軍把總以侍親不願仕泰定丁卯
予過清江而登請曰先君卜兆至再前進士黎公立武
舊撰誌銘未刻而燬於火文不復存以先君之德美詎
可沉沒非先生孰能使之傳敢以為請予方彊壯之時
唐卿譽望洋洋盈耳聞之四十餘年矣每嘉其才畧志
氣卓為人中之傑今又重以孝子之請故為書其可傳
者以表於墓

故延平路儒學教授南豐劉君墓表

南豐之鎮曰軍山峻削聳特上逼霄漢山靈所鍾宜產
奇傑而唐以前無聞逮宋之盛曾子固文章磅礴萬古
真可為茲山配神氣厯鴻意其鬱發而無盡訖宋之世
科舉之藝擅名者數數有而曾之躅未或繼也宋季及
國朝混一之初南豐之彥有若譔祐自求有若劉壘起
潛各以詩文鳴然皆沈晦於下倘俾生慶厯嘉祐間獲
承六一翁鎔範安知其不參子固而三乎譔入國朝時

年踰六十又二十餘年至大德戊戌八十六而終終身
無成劉少謙二十七歲才氣等埒每自相推許方起潛
之在宋已卓犖不羣邑正長郡守倖及鄉先達莫不期
以遠大年三十七而宋亡時勢人情兵謀地利素所諳
練北來鉅公間以事接聽其言論甚器重焉竟亦落落
不偶郡庠缺官當路交薦年五十五始署盱郡學正年
七十受朝命為延平郡教授其教於兩郡也繩檢諸生
作古文廟屋修完學務振舉視食焉怠其事者迥異延

平官滿既代諸生不容其去復留授業者三年乃歸歸
四年延祐己未也年八十矣後八月七日晨興進飯一
匕端坐而逝初殯華野泰定丙寅九月庚申葬廣昌縣
文教里之塔岡劉氏世為儒家其先唐末濠州刺史金
生清淮軍節度使劉仁瞻節使生懷州刺史崇讚懷州
之孫建康通守昭建康之孫著作郎用滋著作之元孫
寧遠縣丞諱從畢是為曾大父大父諱炎父諱岩母揭
氏起潛事母篤孝樂為義舉厚朋友恤貧困拯人於患

難心所至不顧己力之何如研經究史網羅百氏文思如湧泉所著有經說講義水雲村藁泯藁哀鑑英華錄隱居通義凡百二十五卷曾文定公墓祭久廢典鄉校日率諸生以暮夜行禮如初抑其心所尚友者耶娶傅氏先十七年卒子男三龍瑞亦先卒麟瑞鸞瑞孫男二曾孫男二麟瑞走二百四十里詣吾門請表父之墓予於起潛前聞其名後見其文今觀長興州判官許晉孫所狀益歎其時命之不與才志合於是表其所可傳以

示方來使其可傳於人者苟有傳則其不可得於天者固無憾也已

故逸士游君建叔墓表

嗚呼建叔之歿十有一年矣葬已三年而其子惟和始求予文表墓惟和喪父時年甫十有三今既冠既婚而幼學未已思欲不朽其親可謂能子哉建叔諱應斗姓游氏世居撫崇仁縣崇仁鄉其地曰曠郿族大而蕃敦本務實儉勤殖生在宋之季浸浸以盛迨今將百年而

其隆未替也建叔好尚文雅少習進士詩賦藝成而科
廢南土初臣附新官蒞新民俗數有重難之役並緣
侵漁豪橫吞噬之徒又乘間而出短於支柱者率身隕
家毀建叔佐父兄歷危險理紛糾智足以破姦勇足以
禦侮卒底安全而生業彌裕元貞大德以後世道清平
人獲休息乃治園地大室屋日共賓朋詩酒談笑游士
旅客時相遇從殷勤款洽周急憊困皆悅懌而去阜財
不競小利粒饑不踴高價取與各當於義睦宗邨鄰有

請假而無欺覲同產雖別籍友恭弗弛得子晚愛之至
教之篤鄧氏子隨母來歸撫之如己子視禮經繼父之
道無愧焉延祐丁巳七月庚辰以疾終年五十有九久
殯未葬泰定乙丑正月壬辰安厝於株陂道社之原元
配李繼室尤俱無子惟和王出也自予之大父以來與
游族交際建叔於予猶兄弟然富而文才而良吾里之
吉人也子又善繼予是以慨然興懷而文其墓門之石

元贈承事郎德清縣尹朱君墓表

承事郎瑞州路在城務稅課提領朱景淵語其寮樂務副魯常曰吾父諱文進字野夫湖州長興和平鎮人也早失怙失恃鞠於兄從祖渭富饒吝嗇里多仇怨有自經者誣之逮繫於獄幼子莫克救解吾父年甫弱冠上白憲司馬公光祖直其所訴從祖釋械而歸而吾父年甫弱冠畧無德色其後保任友人貸於從祖歲久負欠乃償已產代償其子本而吾父亦無慊意由是去家遠游值宋季世豫計宋幣必將無用罄竭所有市易諸物

未幾宋亡舊幣果廢吾父所貯物貨價長數倍遂得為
興家之資先是太平州黃池鎮賈人以貨寄售直數千
緡既而賈死於兵妻已改嫁吾父悉輸其直俾畜遺孤
吾父與人交際不問賢否無所訾毀號稱長厚或有諮
問必以忠告每推贏餘周卹鄰戚歲饑民疫偵伺炊烟
不起之家陰有所遺不使人知善鑑人之能度其能有
成立者給助貲力彼人既致豐盛所報不如所施無憾
也教子為儒兼習國字景淵藉以仕進嘗適一處樂其

形勢翕聚指示景淵擬為身後墓地皇慶癸丑四月二十五日終年七十有二其年八月葬烏程縣三碑鄉小金山之趾即前所指示者也吾母同邑丁氏諱妙靚勤儉靜柔克相吾父共植吾家致和戊辰三月十四日終年七十有九明年二月祔葬小金山之兆景淵賴父母遺訓服七品章服自嗟祿弗及養幸皇澤優渥追榮於親吾父贈承事郎湖州德清縣尹吾母贈宜人親喪久葬而墓石未豎深懼先德泯墜敢介子以請於翰林吳

學士蘄一言文諸石豈惟吾親托以不朽景淵為子之心庶其有校乎魯嘗將景淵之命來諗予謂景淵之父義足以敦薄俗智足以識幾微而有子能發身榮親俱可尚也是以不辭而表其墓焉朱氏上世有仕者而承事君之曾祖琰祖恒考清皆不仕君之男長景淵季景思女適馬適吳長孫介壽南安路蒙古字學正考滿名在吏部選中景淵能詩能文有猷有守其益自勉益自謹為良吏為聞人使聲實加於上下則立身揚名之孝

又非但如今而已

吳文正集卷七十一

欽定四庫全書

吳文正集卷七十二

元 吳澄 撰

墓誌銘

樂安縣丞黃君墓碣銘

乙亥之冬郡既降下諸縣索降狀樂安令率其僚聯署
以上丞黃君獨不往令遣吏促之方對語云云吏迫之
不動白令令怒俄而吏民數百人集於庭強輿致君顛

踣於地若卒中然衆蹂躪詬罵且曰為是不順將召兵
累我民君佯死為不聞令無如之何同他僚署名應郡
命君有惠愛在民既暮憐之者舁入寘中堂蓐處地上
翌旦或飲以粥氣少續越三日家之人始來視遷就榻
面壁卧旬餘新領郡事者分遣新官治所屬一郡吏來
丞樂其人素敬服君廉正又見府積緡錢甚富諸罷物
一如故可為己有以此德君用交承之禮接待力覆護
為言於郡郡檄召不赴則檄攝縣事亦辭全身以去與

家人完聚爾後連歲盜起挈家辟地靡寧僅定廬於巴
山之下日務治圃觀書年七十二乃終辛卯十一月二
十日也君隆州井研縣人諱申字酉卿弱冠以春秋義
貢禮部比壯再貢戊午出蜀依叔父於南康旅且貧急
就祿己未廷試對策特奏名授迪功郎江州德安尉官
滿轉修職郎撫州樂安丞需次閒居當路命攝縣主簿
州司理又兼提點刑獄事多所辨明寃者獲伸樂安之
政廉謹如初以恩陞從事郎丞相江公萬里提刑黃公

震宋末號名人不輕許可者稱君堅壁禦貧明潔無私其言足徵云蓋惟怯於利者能勇於義君嘗與予言蜀被兵時一守臣先出其帑榜其門曰一身留許國諸子用傳家其年將變君悉遣家人遠避而身自留於官借予一力給使紛擾之際亦逃惟一犬隨君作傳紀其事夫人牟氏繼韓氏先八年卒子四人貴乎草蒙女子一人歸權大元至元二十九年壬辰十月癸丑葬於崇仁宜風之孔陂原君鄉人同知撫州路總管府事眉山

史侯銘墓弗稱賁請更之以刻於墓門予驟辭請逾力
乃銘曰

利之闡截截義之玦揭揭維潔不涅維節不折衆爾懃
懃獨厲烈烈不裂不缺有官斯碣

秋堂陳居士墓銘

古有德人不出諸口而行諸躬與之終日無疾言遽色
溫溫其恭與之終世無藏怒宿怨休休其容嶇嶇末路
委曲新令開釋圍羅清泠沸鼎陰功實弘善報未稱永

藏於斯百世其慶

亡妻余氏墓誌銘

鄉貢進士吳澄妻余氏諱維恭父珏業進士寶祐乙卯
二月庚寅生生十有九年歸為吳氏婦事舅姑相夫教
子悉合道子男四女二二女一男殤存者三曰文曰袞
曰京生三十有七年六月四日食時猶分晝間內事如
常有頃自覺身弱目闇扶至牀如是而終越五年五月
丁酉葬於黃樹谷距家四里而近兆向己銘曰

姑失賢婦夫失賢助子失賢母淑也宜壽而天不與其
何故

將仕郎師濟叔墓誌銘

自進士專科取人士之入仕者世胄與進士兩途而已
雜流特恩不論也宋氏盛時先正諸名公率由進士出
是皆間世之英不待學而能蓋天將擬之以為當世用
假途進士科耳豈是科果能得人也哉嗚呼窮之所學
非達之所用達之所用非窮之所學一旦棄舉子業登

吏部選有民有社臨事懽然者衆矣方且以科第自高
自榮而驕世胄抑孰知彼家庭之所見聞官府之所經
歷監舊章視已事明習法令有非孤寒乍躋仕路者之
所能及哉若故將仕郎師君濟叔其世胄之才者夫惜
其不及於用而止於斯也濟叔諱世美眉州彭山人曾
祖考諱如岡某職朝請郎祖考諱復某州軍事判官朝
議大夫考諱應極知某州某王府教授戶部郎中某監
某大夫妣楊氏封宜人大監公辟地出蜀來居撫之崇

仁師蜀著姓也大監公久負重名一時士大夫傾意願
交知不知咸延頸竦慕走其門者日相踵故雖客寓茲
土而所樹立卓卓聲實氣勢與故家埒大監卒濟叔方
幼學已能相其母持家如其父時澤授將仕郎試於銓
曹未獲仕而天歷改人與法一新異代高門巨室失其
故常無所控倚身殞家圯類十八九濟叔於斯時出入
虎兕甲兵中如升虛履平瓜角兩莫之容措涖政者遠
來未諳習俗及一種乘時用事狴狴狼狽可畏不

惟不見傷害又加愛敬焉濟叔體貌髭髯偉然奇丈夫
工翰墨善辭令終日亶亶不倦接人謙下和易雖兒童
輿隸待之至恭然持己矜莊不屈不辱人自不敢狎慢
為人謀竭盡底蘊論事切中事情多知前代故實閒居
觀書有見輒標識上方客有問應聲對曰史某紀某傳
通鑑某代某年某書所載某人所錄也抽簡帙參驗無
不然其記覽精熟如此使濟叔早獲推其所長施之治
官長民決不碌碌烏乎而止於斯邪而止於斯邪生癸

丑三月二十日享年四十六卒戊戌十二月十八日娶
陳氏融管安撫元晉之孫安遠軍節度推官同祖之女
再娶黃氏樂安人子男三元奎元堅元基女二元直已
歸豫章李元里許歸同邑袁初陳夫人葬長安鄉某里
銀水谷後黃夫人附於其兆之左稍前濟叔卒之三年
十二月十三日甲申合葬於陳夫人之兆將葬陳夫人
之弟輿孫謂予曰子與吾姊夫故且知之悉宜為銘銘
曰

侃侃才曹既苗且秀罹茲多虞談笑昇穀脫人於難匪
直自救早而服官膚敏孰右時哉不偶命也不壽從二
婉藏銘永弗疚

皮母羅氏墓誌

皮母羅氏豐城人生淳祐乙巳二月為趙氏媵歸清江
皮左右君夫人三十餘年既能且賢元貞乙未十一月
得足疾靡藥弗試弗瘳明年四月十四日終九月殯宅
南越七年某月某日塋於金華山之陽生子一人曰潛

趙夫人子之是為總管公之世嫡潛與予友故其母之
葬也予為之志

繆舜賓墓誌銘

繆舜賓宋咸淳間以能賦中程試第一授知樂安縣令
既而得軟脚疾貽書余曰不幸得痼疾顯親揚名之事
已矣先子未沾寸祿齋志以沒宰木且合園其賜我昭
諸幽不朽之辭余不敢當而哀其意轉求諸丙辰進士
第一人廬陵文公天祥竟為其父得志銘舜賓生淳祐

乙巳年五十有七今年初夏豫知死期遺命其子持所書以為平昔所交遊者訣且曰必予為誌銘嗚呼銘墓非古也蓋古之所謂不朽者必於身不必於人後乃不然託諸人以傳不朽其人與其文又未必可以不朽也昔銘舜賓父者其人可傳矣今為舜賓銘者其文可傳乎哉雖然予與舜賓往來久死以是屬予何可辭繆為崇仁甲族舜賓之祖姑歸吏部侍郎李公劉逢國大慶恩霈旁及舜賓之曾祖考祖考俱迪功郎曾祖妣祖妣

俱封孺人舜賓之父諱若鳳鄉貢不第特奏名授修職郎吉州永豐縣尉未及祿而卒母吳夫人教舜賓至成才博記覽善談論於衆中四座輒屈舜賓日與侍郎公家諸曹游處有令陽春者以詩自好從當世能詩者學膏馥所霑丐於是舜賓之詩卓卓不羣樂府長短句四六駢儷語皆工家徒四壁立未嘗有戚容授徒以給其妻子娶吳氏繼胥氏男三女一十二月七日葬故里密坊之原附修職君之兆舜賓名穆前郡守徐公霖所錫

且字之後自更名無咎所著詩文及書語謾抄藏於家
銘曰

四科之一學與文六極之二疾與貧得其一不免其二
天匪人已乎舜賓後千千春眠此墓門

秋堂陳居士夫人黃氏墓誌銘

余讀劉向列女傳及諸史祿記所載母儀婦德尚矣然
士大夫行實修而名湮沒者世何可勝紀况不出閨門
之內者乎若吾里陳夫人黃氏母儀婦德可謂無愧者

也夫人諱某世居樂安之桐岡父兄弟姪皆為儒貢禮
部者相屬歸於吾里陳居士居士德人夫人相之家
道日隆居士既終優游子舍壻家十有餘年福稱其
德年七十有五乃卒生之日寶慶丙戌九月季二卒之
日大德庚子十月上五子男四孟垚仲垚先卒季垚叔
垚女三壻袁士真袁宏道袁士達士真亦先卒孫男四
觀行觀過觀德昌生女四曾孫女一卒之明年二月壬
午塋於里之塔山坪季垚叔垚請銘余昔銘居士云與

之終日無疾言遽色與之終世無藏怒宿怨知者以為非
溢美夫人居士賢配其可銘也已銘曰

父族為士夫族為士母有孝子奉終如始勒銘山趾以
著厥美

覺溪游君墓碣銘

游君常伯侗儻不羣早年以進士詩賦伎雄輩流意科
第可拾芥取既屢試屢屈預貢而降試補國學弟子員
往試又不偶乃確斲廉銳芟毀芽枿教授里中子弟循

循有繩矩談論古今世務臺臺可聽邁時草運天氓有
闇於天厯者致大師君居直通道不虞師之奄至父子
族屬七人為哨兵所獲俱束縛以次就戮戮二人畢其
三將及君君之子君佐不忍見父之死請先殺己小校
義之以白主帥君軀幹偉應對敏帥竒其才得釋上送
於朝事格不報於是君客游燕趙齊梁間甚適恬無仕
進意越數年前主帥參江西行省政至邑有所逮問君
門下士出入左右得豫機密忽有飛語讒君漏言於外

自辯莫可憂懣以卒年五十有二至元癸未四月一日也君之配陳氏後一月亦卒其月合葬於璋湖子男二君佐君佑女一孫男三霖_焱焱女三君諱伯常撫州樂安人家天授鄉之上覺渡自號為覺溪翁余弱冠已知君君卒二十年君佐始立墓石請為誌銘嗚呼余之故人也才如是所到止是其命也已其命也已悲夫遂叙而銘之銘曰

能與不能人者明明成與不成天者冥冥數之不羸有

姜其英吾知吾銘尚假幽局

皮仲宜墓誌銘

往歲客南雄總管皮公之門識公之族弟仲宜甫髫髻
姱脩言論峭直汎掃一室有自讀之書有自吟之詩賓
至焚香淪茗或觴或詠諧笑云云蕭散不羈宛若晉人
風度嘗從總管公撫定郡境有勞帥府欲俾效用弗就
暨名上省府署攝始興縣丞亦弗就前進士路萬里高
之作真贊有褒辭焉赴急解紛慷慨尚義鑑時燭物敏

銳無滯思凡人用所資著發取棄靡不中機歷覽湖湘
淮淝而歸種菊盈庭故相章公為題堂扁曰菊逸年六
十四而終臨終書惟孝惟友可以立身遺其子考諱弁
與徐侍郎卿孫輩諸名人友治毛氏詩有聲仲宜諱儀
克纂父業三兄一弟世居清江下燭娶聶氏子男三野
權李方大為謝氏後女三孫男二野高安教諭務學工
詩今授徒於里構一樓於堂之北將致樂以養而親弗
待矣初喪秋季中旬之三卒窆冬季上旬之二時維大

德九年兆在里中某所野與余善又因總管公之子來
請銘銘曰

入誰之與居出誰之與俱而愉其躬而羸其家而淑其
後以遠須可不謂能乎

宜黃鄧母謝氏壙誌

謝氏妙瑩鄧繼室生丁酉歲四廿七庚子十二廿四卒
儉勤婉順事夫君子名時俊名應元家力豐裕諸孫蕃
乙巳季冬甲申日卜葬未山甲向吉水去流陰丑艮出俊

從余學此母賢為誌幽宅光千年

白山許君墓誌銘

進士科試藝非古也唐人采譽望先期投所業又繇所知薦引雖不免於私然士以此故閒居不敢自毀其名行宋氏糊名考校於立法至公利孤寒不復計平素其選始襍真才實能反或厄於命而終身沉淪若吾白山許君季文甫之藝績粟卓犖同輩所推後輩所師歲乙卯丁卯購其文者咸貢於鄉歲癸酉二俊士共為文霑

丐膏馥亦得預貢而君竟不偶後校官見君策論驚歎
失士稽之乃謄錄院逸去賦卷時代更貢舉廢君負長
伎自好不厭鄉里競延致教子弟餘力哦古近體詩寘
陸務觀劉潛夫集中莫辨同縣甘君泳不習舉子業徧
游東南交當代名人有詩數百篇清絕自成一家仙佛
儒悟解俱涉其藩人稱為東溪先生不娶無後君諱文
薦詩工而奇不談仙佛而談考亭朱氏青田陸氏學欣
然意會人莫能知也間獨與余上下其議論卒之年授

業縣東三十里近甘君墓暇日輒適壟徘徊徬徨悲涕不自勝是年十月十三日卒年七十有七考諱士穎為儒能詩妣羅氏世居撫之宜黃徙崇仁初娶周氏無子再娶繆氏就室於李亦無子養涂氏女為女三娶馬氏就室於劉一男一女後又生二女涂女適黃劉女適聶親生女一許嫁一未許嫁往年官覈戶口一家不得包二姓男若曾遂附許氏籍君教之如子君之喪服斬衰如服父喪具無缺既逾月哀經造余門哭泣請曰繼父

病革時言吾有不朽者在意以囑先生也將葬矣敢請
君與余忘年交不得辭則為之銘宅兆君所自營首西
北鄉曰長安原曰連坊日十八月十二歲大德乙巳銘
曰

於蔚辭數連奇嗇其施豐自嬉晚疇資二陸規山陰支
臨川涯姜兮澌兮噫噫兮悲

鄉貢進士周君墓誌銘

大德八年三月十九日鄉貢進士周君棲梧客死於金

谿死之三日其從子仁乞地于聶氏葬之墓前有古神祠曰周將軍廟君仲弟棲楚先死季弟棲筠客豐城聞喪來奔則已葬議以歸柩于崇仁之祖塋仁曰葬具可其母遷遂歸直於聶而得其所葬地君業舉子尚書義有聲咸淳癸酉以字與貢更字朝陽在大元為崇仁縣儒學教諭臨江路高峯書院山長名在吏部將授儒學教授而君死矣年六十一先世自贛寧都徙撫樂安初年室於郡中之熊落魄不羈常遊食於外於事無心於

物無競所至無不愛悅焉女一人適連以仲氏之子實
為子仁之弟也聶之子為仲氏之壻聶之族女又為仁
之妻以故經紀君之喪有力云君與予友善樓筠娶予
女弟請銘確故銘銘曰

處之時時而來旅之時時而隨醕而怡怡語而嘻嘻噫
不可復奚而不悲

朱氏靜淑墓誌銘

洪士言其鄉鄭氏婦朱氏靜淑幼讀論孟了大意歸夫

家弗逮事姑事二如婦甚恭後事繼姑甚孝舅姑罹寇
難甚哀每遇諱日甚悲相其夫廣家產比初年什伯倍
處變不失常度夫以篋庫之役出則兼治閭外事日有
齎送費猶能以餘力新居室暨夫役滿而還堂構已完
人以田園售不抑其直祈子孫得永保饑歲平糶待之
而舉火者數十家貸收不貳量有負不能償輒折券里
有樵屯渡捐貲造舟以利病涉者凡賓客之饌必躬視
官吏或假館徒御雖衆供給不勞而辦夫嘗與伯兄小

忿從容道手足恩義開諭勸釋夫感悟至泣下友愛終
其身又嘗與鄰有爭亦諫止曰彼良田百畝具以歸我
此獨不能小忍乎延名師教二子夜必自程督問日所
講肄何如子方長家方隆而不幸抱疾以歿歿且八年
宅兆始協吉卜夫季政男元鳳元謙將奉柩窆願得一
言昭諸幽以某嘗授業二子頗悉其家内外事而因某
以請予曰是蓋為斯婦斯母不朽計義夫孝子之志也
斯婦也欲其夫積善以貽後斯母也欲其子務學以光

前賢已夫若子環視其鄰昔赫赫者今寂寂而吾之家
一旦至此其何以守此哉惟當日夕勿忘逝者諫誨之
意益崇善益勉學俾鄉里藹慈良謙讓之譽門戶增詩
書禮義之輝人必曰斯婦實成斯夫斯母實生斯兒不
朽莫大乎是銘不銘奚加損焉雖然孝於姑恭於妯
其夫以從兄睦鄰婦德若茲其可銘乃稽其世世居富
州宣風鄉杭溪里父汝岳母譚氏夫家新建縣德禮郝
侯溪里舅文富姑蕭氏繼周氏女適廣東宣尉之孫靖

安縣尹之子塗浯異孫男四人女三人淳祐丁巳建辰
月端七生大德己亥建酉月季五卒丙午建丑月季四
癸癸返其所生之鄉里鹿興原溉塘銘曰
婦以德妍有美嬋媽銘貞其賢厲彼不然

故龍興學錄鄒君墓誌銘

大德辛丑夏英德倅熊侯謂澄曰吾弟之子妻劔池鄉
河湖里鄒公遂公遂將以某月某日葬其父學錄君於
青坑之原蘄一言光泉壤以疇昔之未獲見也敬介某

以請嗚呼予弗及識鄒君而於侯舊矣禮辭弗許固辭
又弗許則弗復辭為叙其槩君諱敏中字時甫世居古
豫章郡豐城縣今為富州其文業進士通戴氏記淳祐
乙卯幾預貢既復黜試大學平居耽講誦嗜賦詠有雜
詩雜著名靜樂堂藁藏於家其行事父孝母聶夫人終
雖孩執喪不失禮貲產悉委伯兄季年分異唯命所畀
漫弗計贏窳兄歿哀痛切至事伯姊猶兄坦夷軒豁好
賓客日以棋酒相娛捐貲恤鄰無靳色其先曾大父堯

甫大父元廣父輝俱隱德弗耀其後公遂男二女一蕃
衍未艾其配彭澤簿黃詰飛女聶氏繼其壻楊守道其
游少從清江歐陽居宜習經暨長南康江丞相建昌包
樞密廬陵王梓國用同郡萬一鶚章甫皆以客禮待友
道交狀其行者前鄱陽尉趙用信其年嘉定庚辰季秋
五日生至元丁亥季冬望日卒嗚呼鄒君非古所謂一
鄉善士歟生而有文有行死而有子有孫家日肥得吉
兆以窆而銘以昭之其可無恨已銘曰

天嗇其試而豐其嗣雖亡不亡用聞斯閼

林夫人鄭氏墓誌銘

毓於儒家婉於宦族生五子孫男女凡二十曾孫男女
凡十有五逮見元孫受公朝錫帛恩年八十有五乃終
此世之福德人而金谿士林程母夫人鄭氏有焉噫天
所厚也夫人諱惠真父試國學生夫益齋府君知臨湘
縣奉議公之從子夫人為婦而宜禮無違為妻而隨事
無隱為母而慈教無虧門內長幼門外戚疏遠而賓旅

賤而使令待之靡不中則年四十有九而寡總內外餘三十年伯子一薦辛酉歲附貢士榜仲程其次和其次秩季稹唯仲季獲終養孫男十有四立亨永克雍寓宏穹芽末而文言高三人亦先卒芳出為族人後女六曾孫男五明良雷震雷第禮孫女十芽暨良之生與夫人同月日元孫琳夫人卒之日大德丙午六月乙卯卒之明年予去官就醫留富州程挾其所館客周仁為介觸炎暑走三百里自狀其母之行授予泣且請曰程弗克

自奮以顯親大懼沒而弗稱於世將以今年九月壬午
奉柩藏於柘岡邇府君之兆得當代能言者畀之銘庶
其不亡友人黃令炎發復以書助之請予閱其狀夫人
生宋嘉定壬午十月丁丑實與吾母同年而先一月而
吾母先八載逝矣泣然動予哀噫程之哀其母猶予也
銘其可已乎程敦朴士年六十有五孺慕如少允哉賢
母之子銘曰

生也壽死又欲其壽維子之孝

吳文正集卷七十二